



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Abril 2010

Edisaun : Abril 2010

**Arguidu Na'in Lima ba Kazu Homisidiu iha Same hetan Sentensa Tinan Sanolu
Resin Rua iha Prizaun**

Iha loron Tersa Feira, 13/04/10 Tribunal Distrital Suai (TDS) hala'o julgamentu ba kazu krime homisidiu ho numeru prosesu 79 /Crim/TDS/2009. Kazu krime homisidiu ne'e akontese iha tinan 2009 ne'ebé involve arguidu na'in 7 (MRS, CM, LKS, VC, IN, VdL MZS). Husi arguidu na'in hitu ne'e, arguidu na'in lima deit mak prova duni katak halo ka komete krime homisidiu hasoru vítima tuir saida mak haktuir iha Ministeriu Publiku ninia akuzasaun. Entertantu, ba arguidu na'in rua seluk (MRS no IN) Ministeriu Publiku la bele hatudu evidensia ka provas autentiku ba sira nia involvimentu nune'e tribunal deside hodi absolve sira hosi kondensasaun ba prizaun.

Julgamentu ba leitura sentensa ne'e hahú iha oras 14:40 ho kompozisaun husi Juizes kolektivu ne'ebé lidera husi Juiz Dr. Joao Paulo Raposo (Juiz Internacional), Ministeriu Publiku reprezenta Reinato Bere Nahak no arguidu sira hetan assistensia no rezeptasasaun legal hosi Defensor Publiku Marcal Mascarenhas.

Substansia husi desizaun ne'e deklarata katak aktu homisidiu ne'e akontese tanbá arguidu sira deskonfia no la kontente ho vítima VP. Arguidu sira deskomfia katak vítima ne'e hanesan ema buan (uza *magia preta* hodi halakon ema seluk nia vida) ne'ebé halo homisidiu kontra familia arguidu sira nian. Arguidu halo aktu homisidiu ne'e tanbá konsidera ezistensia husi vítima ne'e perigu ba ema seluk iha Same, fatin ne'ebé vítima no arguido sira domisilia ba.

Iha deskripsaun desizaun juiz nian ne'e haktuir katak desizaun tribunal ne'e bazeia ba iha evidensia no depoimentos sira ne'ebé mak produz iha tribunal laran durante prosesu julgamentu ne'e la'o, tantu depoimentos husi vítima no testemuña sira, nomos deklarasaun husi arguidu sira rasik. Bazeia ba deklarasaun ne'ebé mensiona iha leten tribunal hamonu sentensa ba arguidu na'in lima ne'ebé kada ema ida hetan tinan 12 ba aktu violensia ne'ebé sira halo kontra vítima VP.

Bazeia ba konteudu husi desizaun ne'e, katak aktu ne'ebé arguidu sira komete hanesan kontra lei hodi halo aktu homisidiu hasoru vítima VP. Tanbá ne'e arguidu sira tenki responsabiliza ba asaun sira bazeia ba Artigu 338 KUHP tanbá sira ho intensaun no hakarak rasik hakarak halakon ema seluk nia vida. Iha desizaun tribunal nian, juiz afirma katak asaun arguidu sira la bele justifika tuir lei nia tanba deit deskomfia ema ruma nu'udar buan ka kaer aimoruk aat hodi halakon ema seluk nia vida. Aktu ne'e la bele prova tantu liu hosi aspetu mediku nomos aspetu juridiku iha julgamentu tribunal nian

katak familia arguidu sira nia mate ne'e tanba kauza ne'ebé mai hosi vítima. Tanbá ne'e, bazeia ba Artigu 338 Kodigu Penal Indonesia ninian defini katak: *"Ema ne'ebé ho intensaun no hakarak rasik halakon ema seluk nia vida, tanbá komete aktu homisidiu sei hetan pena prizaun kleur liu tinan sanolu resin lima (15)"*

Bazeia ba provizaun artigu refere, Tribunal Distrital Suai hamonu sentensa ba arguidu na'in lima ho pena prizaun tinan 12. JSMP hanoin katak tribunal pena tinan 12 ne'ebé tribunal hamonu ba arguidu sira desizaun ida ne'e merese no realistiku ba arguidu ida-idak ne'ebé komete ona krimi homisidiu. Tanbá tuir JSMP aktu kriminal ho razaun saida deit la bele husik hodi kompensa ho ema seluk nia vida inklui iha kazu refere ne'ebé baziea deit ba senteimentu deskonfia ne'ebé pratikamente konserteza susar atu bele prova ninia lia-loos. Mesmu sosialmente JSMP mos konsiente katak problema ne'e fenomenal tebes, maibe tantu husi aspetu legal no aspetu mediku la bele justifika iha tribunal nia oin. Wainhira situasaun sira hanesan ne'e la hare didiak no proporsionalmente sei fo impaktu ba iha arguidu sira tanbá situasaun ne'e la bele uza hodi halo defeza ba sira nia aan iha tribunal.

JSMP hare katak kna'ar Defensor Publiku iha prosesu desizaun ba kazu homisidiu ne'e la duun halo defeza ne'ebé mak efetivu ba nia kliente. Ne'e bele hare iha tribunal laran wainhira tribunal fo oportunidade atu fo ninia komentariu legal ka ninia defeza ba desizaun tribunal ninian, maibe Defensor Publiku nem fo komentariu ida. JSMP hanoin katak kustume hanesan ne'e sei ofende direitu ema hirak ne'ebé reprezenta ba. Mesmu depois de prosesu julgamentu remata,, adogadu deklara katak sei halo rekursu ba desizaun ne'ebé mak konsidera todan liu ba nia kliente.

JSMP apela atu servisu reprezentasaun ka assistensia legal husi advogado sira tenki halo ho ativu. Tanbá iha kazu barak ne'ebé JSMP observa JSMP deskobre katak sempre iha Defensor Publiku ka Advogadu balun ne'ebé halao servisu reprezentasaun legal ho maximu ba sira nia kliente. Tanbá JSMP kompriende no konseiente katak kna'ar no involvimentu servisu advokasia la'os deit atu fo defeza ba interese ema balun deit ka ema ida deit, maibe kna'ar Defensor Publiku ka Advogadu Privadu atu ajuda determina sistema administrasaun iha tribunal ne'ebé diak no asegura serteza legal (*kepastian hukum*) ba komponente nasaun tomak nian, atu realiza no atinzi estadu de direitu ida ne'ebé ho dignidade iha nasaun ida ne'e.

Atu hetan informasaun kle'an favor kontaktu:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883